

Visoki predstavnik potvrdio Sporazum Gornji Vakuf- Uskoplje i imenovao supervizora

Visoki predstavnik, Wolfgang Petritsch, u subotu 15. septembra 2001. Godine, izdao je Odluku kojom se potvrđuje i podržava Sporazum Gornji Vakuf-Uskoplje potpisan u Travniku 2. avgusta ove godine. Pomenutom Odlukom Visokog predstavnika također se imenuje Bernd Burwitz, porijeklom iz Njemačke, na mjesto supervizora za Opštinu Gornji Vakuf-Uskoplje. Viši zamjenik visokog predstavnika, Matthias Sonn, posjetio je danas Gornji Vakuf-Uskoplje i izložio pomenutu Odluku predstavnicima Srednjobosanskog kantona i opštine Gornji Vakuf-Uskoplje.

U skladu sa Sporazumom koga su potpisali Dževad Agić i Nikola Milić, predstavnici opštine Gornji Vakuf-Uskoplje, zatim predsjednik Srednjobosanskog kantona, Rudo Vidović, i njegov zamjenik, Nedžad Hadžić, pomenutom Odlukom Visokog predstavnika ime opštine i naselja Gornji Vakuf mijenja se u Gornji Vakuf-Uskoplje. Nova jedinstvena opštinska uprava biće smještena u obje zgrade koje trenutno koriste paralelne uprave, s tim da će pojedinačni odjeli biti ujedinjeni i smješteni u samo jednoj od zgrada. Uredi načelnika opštine i njegovog zamjenika također će biti smješteni u istoj zgradi, a pomenute funkcije podlijeagaće periodičnoj rotaciji.

Potpisnici Sporazuma su prije izvjesnog vremena pozvali Visokog predstavnika da njihovom političkom kompromisu da zakonsku snagu, što je Visoki predstavnik i učinio Odlukom koju je donio u subotu i time što je imenovao supervizora za provedbu Sporazuma.

Odlukom Visokog predstavnika nalaže se da će se Prijelazno općinsko vijeće sastati u roku od petnaest dana nakon stupanja na snagu Odluke kako bi izabralo načelnika općine i njegovog zamjenika, te druge općinske zvaničnike. Na svojoj prvoj sjednici Vijeće će usvojiti novi statut, poslovnik i plan sistematizacije za Općinu Gornji Vakuf-Uskoplje. Sastav Prijelaznog općinskog vijeća zasniva se na popisu stanovništva iz 1991. godine, a čine ga 23 prethodno izabrana člana Općinskog vijeća Gornjeg Vakufa i 16 novih vijećnika određenih Odlukom.

Bernd Burwitz, koji veoma dobro poznaje situaciju u Srednjobosanskom kantonu, kao supervizor imaće zadatak da nadgleda provedbu svih aspekata Odluke visokog predstavnika, da radi na ubrzanju napretka u općini, da redovno podnosi izvještaje Visokom predstavniku, i da arbitrira u slučajevima u kojima se to pokaže neophodnim.

Tokom svoje današnje posjete Gornjem Vakufu-Uskoplju, Viši zamjenik visokog predstavnika pohvalio je pozitivnu atmosferu koja je rezultat Sporazuma od 2. avgusta, na kojemu je i zasnovana Odluka Visokog predstavnika, potom sve pragmatičniji pristup lokalnih predstavnika, te ključnu ulogu Ulricha Buchera, Specijalnog izaslanika Visokog predstavnika u Bugojnu, u postizanju navedenog sporazuma.

Viši zamjenik visokog predstavnika rekao je kako Sporazum doprinosi konsolidaciji Federacije Bosne i Hercegovine, podupire pravnu državu i pruža dokaz da pomirenje i partnerski odnos zaživljavaju. Viši zamjenik visokog predstavnika je također dodao da će se time situacija u tome području nesumnjivo poboljšati, te će se stimulirati interes međunarodnih donatora i investitora. On je također obznanio da je Vlada Njemačke odobrila program obnove 50 kuća.

Odluka Visokog prestavnika stupila je na snagu 15. septembra 2001. godine i biće objavljena u "Službenim novinama Federacije Bosne i Hercegovine."